

Wednesday, August 13, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

I-DAY 2025

Kum dang ang bawkin, ramchhung hmun dang rualin Mizoram hmun hrang hrangah August ni 15 hian Independence Day vawi 79-na ropui takin lawm a ni leh dawn.

Mizoramah chuan he Ni puala lawmna pui ber chu Sipai Lammualah August ni 15 zing dar 9:00 ah neih tan a ni ang a. He hunah hian Chief Minister Pu Lalduhoma chu khuallian a ni dawn a. Lammualah Hnam Puanzar pawtparhin Parade Contingent te a endik ang a, an chibai buknate chhangletin March Past neih zui a ni ang. Chief Minister-in Independence Day thuchah a sawi zawhah National leh State Award chi hrang hrangte a sem nghal ang a, Parade contingent-te hnenah lawmman a hlan bawk ang.

Minister ten chan insemi District Headquarters zawng zawngah an hmanpui ang a, Sub-Division (Civil) leh Block hrang hrangah sawrkar anga lawmna inkhawm neih a ni bawk ang.

Home Minister Pu K. Sapdanga chuan Lunglei ah a hmanpui dawn a, Health Minister Pi Lalrinpuii chuan Siaha ah hmanpuiin EF&CC Minister Pu Lalthansanga'n Champhai ah a hmanpui dawn a, PWD Minister Pu Vanlalhlana'n Kolasib ah hmanpuiin Serchhip ah Supply Minister Pu B. Lalchhanzova'n a hmanpui dawn a, Pu Lalnghinglova Hmar in Lawngtlai ah hmanpuiin Pu C. Lalsawivunga'n Mamit ah a hmanpui dawn a, Saitual ah Pu Rodingliana'n hmanpuiin Khawzawl ah Pu PC Vanlalruata'n a hmanpui dawn a, Hnahthial ah School Education Minister Dr Vanlalhlana'n a hmanpui dawn a ni.

Mizoram sawrkar chuan he hun pawimawh tak hmang tur leh a hmanna hmunah te, tel theuh turin khua leh tui zawng zawng te a sawm a. A bik takin sawrkar hnathawkte chu Independence Day lawmna programme-ah tel ngei tura hriattir an ni.

Lammuala Independence Day programme hman zawh a nih hnu chhun dar 11 ah sawm bikte tan Governor's 'AT HOME', Raj Bhawan-ah a awm leh dawn a ni.

Hetih rual hian khua leh tui ten an chenna inah leh an hnathawhna in bakah sawrkar pisa zawng zawngah India hnam puanzar tar turin sawkar chuan a ngen bawk a ni.



LS MP

Nimin khan Lok Sabha MP Pu Richard Vanlalhmangaiha chuan Border Road Organisation (BRO) Headquarter ah an Director General, Lt. General Raghu Srinivasan chu a pisa ah a kawm.

Pu Richard Vanlalhmangaiha chuan Mizoram chhunga BRO enkawl kawngte leh hmasawwna hrang hrang an thawh mekte chu chak lehzuala hma la turin a ngen a. PUSHPAK Project hnuaia RCC bridge thawh mek chawlh lailawk te chu chhonzawm vat a nih theih nana hma la turin BRO Director Genenral hi a ngen bawk a ni.

District pathum Lawngtlai, Siaha leh Champhai district-a Land Acquisition la pek fel lohte chu a hma lama pek fel a nih thuai theih nan hma la turin DG hi Mizoram Lok Sabha MP chuan a ngen bawk a. Siaha District-a Tipa-Laki-Lope-Lopu (LTTT Road) kawng laih meka Additionnal Compensation Cheng Vaibelchhie 82 la tang mek chu thifel thuai turin a ngen bawk a ni.

Lt. General Raghu Srinivasan Mizorama an hna thawh mekte leh la thawh turte pawh a tha thei ang ber leh rang taka thawh a nih theih nan a hmalak nghal a nih tur thu MP hi alo hrilh a. Land Acquisition leh Compensation la pek loh chungchang pawh an ngaihtuah nghal tur thu a lo hrilh nghal bawk a. Lt. General Raghu Srinivasan chuan Mizorama an hnathawhte a hmun ngeia en a la tum thu a sawi bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



DRUGS FREE INDIA RALLY

Tukin khan Nasha Mukta Bharat Abhiyan (Drugs Free India Campaign) Mizoram State Level leh Aizawl District Level bultumin Aizawlah School leh College hrang hrang atanga zirlai 600 chuang ten kawng an zawh a. Chief Minister Pu Lalduhoma chuan a telpui.

Hmun hnih, Chanmari leh Sikulpuikawn atangin kawng hi zawh a ni a, Lammualah lut khawmin Rally kharna buatsaih zui a ni. Chanmari atanga kawng zawhte hi Chief Minister hian a vailiam a, an zingah tel ve nghalin Lammual thlengin a kal a ni.

A kharna inkhawmah hian thu sawiin Chief Minister chuan, Mizoram chu ruihhlo siamna hmunpui Golden Triangle an tih mai depa awm an nih vangin ruihhlo chu hmuh tur a tam thin a ti a, ruihhlo chuan eng thil tha mah min pek loh avangin tih ve kher tur tihna a nilo a ti a, A ruka zuarte chu khawtlangin hnawl ngam a, An phu tawh hremna hmu ngei se a duh tih sawiin Mipuite tan tlan a pawimawh a ti a, Ruihhlo bawiha tang mekte chu huaisen taka kalsan ngam turin a fuih bawh.

Tukina kawngzawhte hian thuziak an keng a, an au rual bawh a. Placard siamtute tan inelna buatsaih a ni a, lawmman dawngtute hnenah lawmman hlan nghal a. Miss Vanlalnunluangi, Miss Grand India kaihhruaiin kal khawmtan thutiam (Pledge) an nei bawh.

Nasha Mukht Bharat Abhiyaan (Ruihhlo Tello India Campaign) hi India ram chung district 372 ah kalpui mek a ni a, Mizoramah hian District zawng zawngah kalpui a ni. He campaign hian ruihhlo that lohzia zirtir leh a la ti ve lo te venhim hi a tum ber a ni. Nasha Mukht Bharat Abhiyaan kum nga na (5 years) pualin Sawrkar laipui chuan India ram pumah nasa taka campaign hi kalpui turin ruahmanna a siam a. Aizawlah pawh he rally hi buatsaih a ni.



DRUGS SEIZED

Aizawl khawpui chung hmun pathum atangin Heroin Hawng 37 leh a neitu-a puh mi 3 man a ni.

Excise & Narcotics, Assam Rifles leh CADS tang ho chuan nimin zing dar 8:45 khan Aizawl Thuampui vengah Heroin hawng 3 leh a neitu-a puh Vanlalrinawma (kum 22) Aizawl Zarkawt veng ni-a inchhal an man a. He thubuai chhui zuina atangin nimin chhun dar 12:45 khan Bawngkawn Venglai-ah Heroin hawng 22 leh a neitu mi pahnih - Agnes Lalrempuii (kum 23) Muthi, tuna Bawngkawn Venglaia khawsa mek ni-a inchhal leh Lalngaihpuui (kum 31) Champhai District-a Diltlang khaw mi, tuna Durtlang Venglai-a khawsa mek ni-a inchhalte an man. Heng heroin neitu-a puhte inpuanna atang hian nimin chawhnu dar 2:45 khan Zuangtui-ah Heroin Hawng 12 an man belh a ni bawh.

Heroin man zawng zawng hi Hawng 37 a ni a. A neitu-a puhte hi ND&PS Act hmanga thubuai siamsak an ni.

